

DIDZA' ZÍ'ALÖ GUSÖL-LĚ'Ě PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Ca rě'ëni quézinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxön.

² Rugapa' Dios libí'ili', böchi' luzá'ado', rudúbili' queë' Dios lu yödzö Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxön len yúgu'të nupa nacua' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'.

³ Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Yugu' le ruzí'iru' xibé tu' néquiru' queë' Cristo

⁴ Rética'sa'në' Dios: "Xclenu'" ca naca queëli', tu' zoa le buzá' ládxë'ë Dios queëli' tu' nácali' tuz len Jesucristo.

⁵ Tu' nácali' tuz len Cristo, Dios chinagú'udë'ë xinözili' yúgu'të le nequi queë'. Rácalenë' libí'ili' ca naca yúgu'të didza' ruí'ili', en runë' ga réajni'ili' yúgu'të.

⁶ Caní naca, tu' guzxi' lu ná'ali' idú ládxi'li' le runtu' liná' lo ca naca queë' Cristo.

⁷ Que lë ni na', biti' bi riyadzaj queëli' que le runnë' Dios Bö' Lá'ayi queëru', tsanni ni ribözali' dza na' ilá' lahuë' Xanru' Jesucristo.

⁸ Lë cazë' utipë' ládxi'li' para gaca guá' ilenli' yúgu'të ga idxintë dza údxi, para cabí gaca nu bi innë queëli' dza ni' huödë' Xanru' Jesucristo.

⁹ Dios runë' ca rnnë', en Lë cazë' bulidzë' libí'ili' para gácali' tuz len Zxi'inë', Xanru' Jesucristo.

Narúajgaca choplö bönachi queë' Cristo nacué' Corinto

¹⁰ Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Biti' irúajli' choplö, pero guli'gaca tuz ca rizá' ládxi'li', en ca runi libí'ili'.

¹¹ Caní rea' libí'ili', böchi' luzá'ado', tu' gula'guíxjöi'inë' neda' bönni' nacué' lídxinu Cloé ca runli', ta'nnë' ridil-la dídza'li'.

¹² Lë ni rnniá': Nadzá'lö didza' ru'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo.

¹³ ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queëli'? ¿Naru' bidí'latsali' nisa para gácali' tuz len neda'?

¹⁴ Rea'-në' Dios: "Xclenu'", tu' cabí buquila' nisa niturö libí'ili', pero chópasë' Crispo, en Gayo.

¹⁵ Que lë ni na' biti' gaca innali' bidí'lali' nisa para gácali' tuz len neda'.

¹⁶ Lësca' buquila' nisa Estéfanos, en nupa nacué' lidxë'. Biti' röjneda' channö buquila' nisa nu yúbölö.

¹⁷ Gusöl-lë'ë Cristo neda', calëga para uquila' bönachi nisa, pero para guna' libán que didza'

dxí'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

Cristo napa cazë' yöl-la' huáca, en yöl-la' réajni'i queë' Dios

¹⁸ Nupa nácgaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusölá rë'u.

¹⁹ Caní naca, tu' nazúaj lu guichi lá'ayi le rnna: Guna' ga huöáca nítisö yöl-la' rácada' quégaca nupa taca yenni'.

Tsölá'alö ucá'ana' yöl-la' réajni'i quégaca nupa ta'yéajni'i yenni'.

²⁰ ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nazëdadë'ë? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga böáca cá'asö yöl-la' réajni'i quégaca bönachi yödzölió ni.

²¹ Dios, lu yöl-la' réajni'i queë', biti' bë'ë lataj ilúnbe'e bönachi yödzölió ni Lë' ni'a que yöl-la' rácada' quégaquië'. Dios guyaza lãdxë'ë busölë' nupa ta'yéajlë' Lë' ni'a que libán na' runru', sal-la' téquiguequi bönachi cá'asö naca.

²² Té'ënnë' yugu' bönni' judío ila'lé'enë' yöl-la' huáca nácgaca bë', ate' bönni' zi'tu' ta'guiljë' yöl-la' réajni'i.

²³ Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zícá'rö bönachi téquiguequi cá'asö naca.

24 Bönni' na' bulidzë' Dios légaquië', sal-la' nácagaquië' bönni' judío o bönni' zì'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios.

25 Téquiguequi bönachi yödzölió ni le benë' Dios naca bë' biti' bi nözinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca quégaca bönachi.

26 Na'a, böchi' luzá'ado', guli'tsöjné ca gúcali' cate' bulidzë' Dios libí'ili'. Biti' gula'cu'ë ladjali' zían bönni' ta'yéajni'inë' lu yöl-la' bönáchisö quégagaquië', en biti' gula'cu'ë ladjali' zían bönni' unná bë', en calëga zían bönni' nácagaquië' lo.

27 Téquiguequi bönachi yödzölió ni yugu' bönni' na' guröë' Dios biti' bi nözguequinë'. Caní benë' Dios para gunë' ga ulu'tuí'i nupa ta'yéajni'i. Lësca' caní guröë' Dios nupa nacuídi'gaca yödzölió ni para gunë' ga ulu'tuí'i nupa nál-lagaca.

28 Lësca' caní, téquiguequi bönachi yödzölió ni nupa na' guröë' Dios nácagaca cá'asö, en biti' bi nácagaca, en nacuídi'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni.

29 Que lë ni na', cuntu nu gaca gun ba zxön cuini lahuë' Dios.

30 Dios caz benë' ga nácaru' tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuóácaru' tsahui', en néquiru' quez queë' Dios, en nuláru'.

31 Naca ca na' nazúaj lu guichi lá'ayi, le rnna: "Channö zoa nu bi rë'ëni gun zxön, ral-la' gun zxön

Xanru'."

2

Libán runru' queë' Cristo, ca gudë'ë lë'e yaga cruz

¹ Caní guca, böchi' luzá'ado', cate' bidxina' queëli'. Bena' libán loli' que xtídzë'ë Dios, calëga len yöl-la' réajni'i quia', en bití' bë'a didza' lu yöl-la' rácada' quia'.

² Cate' ni' guzóalena' libí'ili', bë' ládxa'a cabí gu'a didza' que le yúbölö, pero ca nácatë queë' Jesu-cristo bë'a didza', ca na' gudë'ë lë'e yaga cruz.

³ Guzóalena' libí'ili' lu yöl-la' ricuidi' quia', ate' lu yöl-la' radxi quia' guzxízida'a.

⁴ Bë'lena' libí'ili' didza', en bena' libán que xtídzë'ë Dios, calëga ca tuí'i didza' bönachi lu yöl-la' rácada' quéguequisö, pero guzóalenë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idútë li didza' bë'a.

⁵ Caní bena' para gaca tséajlë'ëli' Dios, calëga tu' biyönili' yöl-la' rácada' quégaca bönachi, pero tu' bilé'eli' yöl-la' huáca queë' cazë' Dios.

Dios Bö' Lá'ayi runë' ga núnbë'ëru'-në' Dios

⁶ Ruí'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni bití' naca ca le nápagaca bönachi yödzölió ni, en bití' naca ca le nápagaquië' bönni' ta'nná bë'ë dza ni zóaru' na'a, nupa na' ta'niti caz.

⁷ Ruí'itu' didza' que yöl-la' rácada' nagachi', lë na' runödzjë' Dios, tu' bigachi' yöl-la' rácada' na' buzóë' Dios dza ni'te para uzí'iru' xibé.

⁸ Yugu' bönni' ta'nná bē'ē dza ni zóaru' na'a bití' gulúnbē'ē yöl-la' rácada' na'. La'tu' gulúnbē'ē le, bití' ulu'dé'ē Xanru' nayépisētērē' lē'e yaga cruz.

⁹ Naca ca na' nazúaj lu guichi lá'ayi le rnna:

Chinupé'ē Dios le ulu'zí' xibé nupa nadxí'iguequi
Lē',

yugu' le cuntu nu ble'e, en bití' biyöni,

en bití' gula'zá' ládxi'gaca bönachi ca naca que.

¹⁰ Na'a, Dios nuzéajni'inē' rē'u yugu' lē ni lu nē'ē Dios Bö' Lá'ayi, tu' ruyú cazē' Dios Bö' Lá'ayi yúgu'tē, enca' le yu'u icja ládxi'da'ahuē' Dios caz.

¹¹ ¿Naru' gaca inözinē' nu bönni' le yu'u icja ládxi'da'ahuē' ia'tué' bönni'? Tuz bö' naca cazē' bönni' na' nözi lē na'. Lē'sca' caní, cuntu nu nözi le yu'u icja ládxi'da'ahuē' Dios. Tuzē' Dios Bö' Lá'ayi nözinē' lē ni.

¹² Rē'u ni, bití' nazí' lu ná'aru' tu bö' ridasö yödzölió ni, pero nazí' lu ná'aru' Dios Bö' Lá'ayi, Nu na' ruchíziē' Dios rē'u para gaca gúnbē'ēru' yugu' le buzá' ládxi'ē Dios queēru'.

¹³ Yugu' lē na' buzá' ládxi'ē Dios queēru' ruí'iru' didza' que, calēga len didza' tu'sédinē' bönachi rē'u len yöl-la' rácada' quéguequi, pero len yugu' didza' rusédinē' Dios Bö' Lá'ayi rē'u. Caní naca, ruzéajni'iru' bönachi zóalenē' Dios Bö' Lá'ayi légaquiē' ca naca le rusédinē' Dios Bö' Lá'ayi rē'u.

¹⁴ Tu bönni' bití' zóalenē' Dios Bö' Lá'ayi lē' bití' rizí' lu nē'ē le rusédinē' Dios Bö' Lá'ayi rē'u, tu' réquinē' cá'asö naca. Bití' gaca tséajni'inē' bönni' na' lē ni, tu' gaca guéquibe'enē' tuzē' bönni' zóalenē' Dios Bö' Lá'ayi lē' le nazaca' lē ni.

15 Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntú nu gaca guéquibe'e le nazaca' cazë' bönni' na'.

16 Nazúaj lu guichi lá'ayi le rnna:

¿Nuzxi caz nözi le rizá' ládxë'ë Xanru'?

¿Nuzxi caz gaca uzéajni'i Lë'?

Le rizá' ládxë'ë Cristo yu'u icja ládxi'do'oru' rë'u.

3

Nácaru' huen dxin tsözxön len Dios

1 Que lë ni na', böchi' luzá'ado', biti' guca gü'ílëna' libí'ili' didza' ca ru'ílëna'-në' didza' tu bönni' nudödi cuinë' lu në'ë Dios Bö' Lá'ayi, pero bé'lëna' libí'ili' didza' ca ru'ílëna' nu naca bönáchisö didza', biti' zóalenë' Dios Bö' Lá'ayi nu na'. Nácali' ca yugu' bí'i hué'ëni. Biti' nácali' tsutsu ca réajlë'ëli'-në' Cristo.

2 Busédida' libí'ili' le cabí naca böniga, lë na' guca ca nidxi' gü'ili'. Biti' busédida' libí'ili' le naca böniga ca bëla' gáguli'. Biti' guca tséajni'ili' le naca ca bëla' gáguli', en bití' rácali' na'a.

3 Caní naca, tu' nácali' ca nu naca bönáchisö ga ridxintë na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödzölió ni.

4 Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

5 ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queëtu'.

⁶ Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa, pero Dios benë' ga gulén, en guzxón xisedo' na' nadúz icja ládxi'do'oli'.

⁷ Caní naca, láti'do'os nazáquië' bönni' guz, en láti'do'os ca' bönni' rigu'ë nisa, pero nazáca'dë'ë Dios Nu run ga rilén, en rizxón xisedo' na'.

⁸ Tuz ca nácagaquië' bönni' razë', en bönni' rigu'ë nisa. Dios ubi'ë que queëgaquië' tsca naca dxin runë' tu tuë'.

⁹ Nácatu' huen dxin tsözxón len Dios, ate' libí'ili' nácali' ca la' yëla queë' Dios ga runtu' dxin.

Lësca' caní nácali' ca tu yu' u runë' Dios.

¹⁰ Ca naca le buzá' ládxe'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'.

¹¹ Dios chigulu'ë tu xilibi zö'ö le naca Lë cazë' Jesucristo, ate' cunttu nu gaca cu'u ia'tú xilibi zö'ö caní.

¹² Dxin runru' queë' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiöj nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö.

¹³ Gaca bë' ca naca dxin núngaca tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tödi dxin na' lu guí', ate' guí' na' si' bë' dxin núngaca tu tu bönachi.

¹⁴ Channö dxin nunë' tu bönni' urúaj dxi'a lu guí' na', le naca ca tu zö'ö guchisë', Dios ubi'ë queë' ca sa'yéaj dxin nunë'.

15 Channö tsegui dxin nunë' tu bönni' le naca ca tu zö'ö guchisë', unítie' le ré'ënë' ubi'ë Dios queë', pero ulá cazë' lë', ate' gaca queë' ca raca que nu rulá tu lu guí'.

16 ¿Naru' cabí nözili' naca cázali' yudo' queë' Dios, ate' zoë' Dios Bö' Lá'ayi icja ládxi'do'oli'?

17 Channö nu usuniti yudo' queë' Dios, Dios usunítie' nu na', tu' naca lá'ayi yudo' queë' Dios, ate' libí'ili' naca cázali' yudo' na'.

18 Biti' si' ye'e cuinli'. Channö réqui nu nutsa' ládjali' rácada' ca tácada' bönachi yödzölió ni, ral-la' huóáca nu na' ca tu bönni' biti' bi nözinë', para gata' que yöl-la' rácada' le naca idú.

19 Nu bönni' napzë' yöl-la' rácada' que yödzölió ni náquië' tu bönni' biti' bi nözinë' lahuë' Dios. Nazúaj lu guichi lá'ayi le rnna: "Dios runë' ga ila'chixi ila'nigui nupa tácada', rugunë' dxin yöl-la' rácada' quéguequi."

20 Lësca' caní rnna: "Xanru' nözinë' nítisö naca le ta'bequi ícjagaca bönachi tácada'."

21 Que lë ni na', biti' ral-la' gunli' zxön le gaca gunë' tu bönni'. Nequi queëli' yúgu'të.

22 Néquiguequi queëli':

Pablo, en Apolos, en Cefas,

en yödzölió ni,

en yöl-la' na'bán, en yöl-la' guti,

en dza ni zóaru' na'a, en dza si' za'.

Yúgu'të nequi queëli',

23 ate' libí'ili' néquili' queë' Cristo,

ate' Cristo néquinë' queë' Dios.

4

Dxin tunë' bönni' gubáz nasöl-lë'ë Cristo

¹ Que lë ni na', ral-la' guéquili' nácatu' netu' huen dxin queë' Cristo, en nazi' lu na'tu' le nagachi' queë' Dios.

² Yugu' bönni', Dios nudödë' lu ná'agaquië' ulu'gunë' dxin le nequi queë', run bayudxi ilunë' idú dxi'a le tunë'.

³ Biti' bi ruí' i ládxa'a channö uchi'a usöröli' neda', o channö ulu'chi'a ulu'sörö bönachi yödzölió ni neda'. Biti' ca' ruchi'a rusörö cuina'.

⁴ Biti' ruxós ládxi'da'ahua' neda'. Lë ni bití' naca bë' bití' nabága'a xíguia'. Xanru' náquië' Nu ruchi'a rusöröë' neda'.

⁵ Que lë ni na', bití' ral-la' uchi'a usöröli' nu bönni' zí'alö ca idxín dza que. Guli'cöz dza ni' huödë' Xanru', ate' Lë' ubéajë' ga liná' le nagachi' ga chulla, en ulu'ë lahui le yu'u icja ládxi'do'gaca yúgu'të bönachi. Ní'irö Dios ubi'ë que queégaca bönachi le gun bal léguequi ca ral-la' gaca quéguequi.

⁶ Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en bití' gunli' zxön tuë' bönni', en bití' uzóali' tsólá'alö ia'tué'.

⁷ ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizx que run ba zxön cuinu', réquinu' rácasö quiu' bidéli'nu' lë na'?

⁸ ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queéli'? ¿Naru' réquitseli' rinná bë'ëli', sal-la' bití' rinná bë'ëtu' netu'? Ni'a

queë' Xanru' Dios rë'ënda' inná bë'ëli' para gaca inná bë'lentu' libí'ili' tsözxõn.

⁹ Runi neda' naca queëtu', bönni' gubáz queë' Dios, ca nuzóë' netu' zéajtu' xibánitë ca na' raca quégaquië' bönni' chinarugu quégaquië' ilátië' lahui' lógaca bönachi. Nácatu' ca tu le tu'yuda' bönachi yödzülió ni, enca' ca tu le tu'yüdë'ë gubáz lá'ayi queë' Dios.

¹⁰ Tu' rë'ënitü' guntu' xichinë' Cristo, ru'itu' bönachi lataj téquiguequi nácatu' bönni' biti' bi nözquequinë', pero libí'ili' réquili' rácada'ali' tu' nácali' queë' Cristo.

Libí'ili' réquili' chinál-lali',

pero téquiguequi bönachi nacuídi'tu' netu'.

Tu'zóa bönachi netu' tsölá'alö,

pero tun libí'ili' bal.

¹¹ Ga ridxintë na'a dza, riduntu', en ribídxitu' nisa. Biti' dë lari' gácutu'.

Tun bönachi netu' zi', en biti' zoa lídxitu'.

¹² Rusaca' zi' cuintu', la' nétu'sö runtu' dxin.

Tu'lidza bönachi netu' zi',

pero netu' rinábatu' le gácalen léguequi.

Ta'bía ládxi'gaca bönachi netu',

pero ruá' rilentu' le.

¹³ Ta'nnë' queëtu',

pero lu yöl-la' nöxaj ladxi' ru'ilentu' légaquië' didza'.

Ga ridxintë na'a dza nácatu' ca bëbu que yödzülió ni,

en ca tu le ta'ru'una yúgu'të bönachi.

¹⁴ Ruzúaja' queëli' caní lu guichi, calëga tu' rë'ënda' guna' ga utuí'ili', pero rë'ënda' uzéajni'ida'

libí'ili', runa' ca runë' tu bönni' ruzéajni'inë' yugu' zxi'ini cazë' tu' nadxí'inë' légacabi'.

¹⁵ Sal-la' gaca zían gáyu'ë bönni' ila'cuá'alén libí'ili', en ulu'sédinë' libí'ili' ca naca queë' Cristo, tuz nu zoa naca ca xúzili', nu na' ben ga néquili' queë' Cristo. Lu yöl-la' na'bán cubi le náпали' tu' dzágali' Cristo, neda' caz naca' ca xúzili' tu' busiyönda' libí'ili' didza' dxi'a.

¹⁶ Que lë ni na', ráta'yua' loli' gü'i ládxi'li' gunli' ca runa' neda'.

¹⁷ Que lë ni na' ca' risöl-la'a-bi' bi'i Timoteo ga zóali'. Tu' rúnlenbi' neda' dxin queë' Xanru' nácabi' ca zxi'ini caza', en nácabi' idú ladxi', ate' nadxí'ida'-bi'. Gunbi' Timoteo ga tsöjnéli' yugu' xibá rusédida' tu' néquida' queë' Cristo, yugu' le rusédida' yúgu'të lataj lógaca yúgu'të cö' bönachi queë' Cristo.

¹⁸ Bál-lali' run ba zxön cuinli' tu' réquili' bíti'rö udxina' ga zóali'.

¹⁹ Na'a, la' udxíntea' ga zóali' channö Xanru' gunnë' neda' lataj. Ní'irö guéquibe'eda', calégasö didza' tu'ë bönni' tun ba zxön cuíngaquië', pero guéquibe'eda' channö zóalen yöl-la' huáca queë' Dios légaquië'.

²⁰ Channö nazí' lu ná'ali' rinná bé'enë' Dios libí'ili', biti' naca bë' naca caní tu' rnnásili' ca'. Naca bë' naca caní channö zóalen libí'ili' yöl-la' huáca queë' Dios.

²¹ ¿Bízxilö ré'ënili'? ¿Naru' ré'ënili' udxina' ga zóali' len gubá'ayi, para guna' libí'ili' zi', o len yöl-la' nadxí'i, en lu yöl-la' nöxaj ladxi'?

5

Pablo ruchi'a rusöröë' tuë' bönni' runë' le ruá' dö'

¹ Rizë didza' zóalenë libí'ili' tuë' bönni' runë' le ruá' dö', tu' zóalenë nigula queë' xuzë'. Le ruá' dö' caní'biti' ca' tun bönachi bití' núnbë'gaca Dios.

² Libí'ili' run ba zxön cuinli', pero ral-la' huí'inili', en ubéajli' nu na' run dul-la' na' ga zóali'.

³ Sal-la' bití' zóalena' libí'ili' lu idútë le naca', le nácatë zóalena' libí'ili' lu bö' naca caza'. Ca chizóalen caza' libí'ili' chibuchí'a busöröa' nu na' run dul-la' na'.

⁴ Cate' udúbili' queë' Xanru' Jesucristo guna' libí'ili' tsözxön lu bö' naca caza'. Ní'irö, len yöl-la' huáca queë' Xanru' Jesús

⁵ bulí'dödë' bönni' na' lu na' Satanás tu' xihui' para initi idútë le naca cazë', pero ulá bö' naca cazë' dza ni' huödë' Xanru'.

⁶ Bití' naca dxi'a gun ba zxön cuinli' ca naca le runli'. ¿Naru' cabí nözili' didza' na' rnna: "Cua zído'os que yöta xtila gun ga chazxaj idútë cúa nazí'i le"?

⁷ Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazí'i cúa zi que, ca na' le nácatë chinácali'. Naca queëru' ca chizóaru' Laní Pascua cate' tahuë' yöta xtila bití' nazi' cúa zi que, en chigulútië'-ba' uláz queëru' bö'cu' zxila' que Laní Pascua na', bö'cu' zxila' na' náquië' Lë cazë' Cristo.

⁸ Que lë ni na' ral-la' gunru' laní na', calëga zóalen rë'u cúa zi gulás na' le ruluí'i le ruá' dö', en le cabí nazaca', pero ral-la' ugunru' dxin yöta xtila na' bití' nazí'i cúa zi que, yöta xtila na' ruluí'i le naca idú dxi'a, en le naca idútë li.

⁹ Cate' buzúaja' queëli' lu guichi zí'alö, gudxi caza' libí'ili' bití' gunli' tsözxön bönni' tunë' le ruá' dö'.

10 Gudxa' libí'ili' caní, calëga para ucuítali' tsaz ga nacuá' bönachi yödzölió ni, nupa tun le ruá' dö', en ga nacuá' bönachi ta'zë ládxi'gaca le dë que luzë'eguequi, en ga nacu'ë yugu' bönni' gubán, en bönachi ta'yéaj ládxi'gaca budó' guiöj budó' yaga. Para gunli' caní gun bayudxi irúajli' yödzölió ni.

11 Le rë'ëni inná didza' na' buzúaja' queëli' zí'alö naca para cabí gunli' tu zxön tuë' bönni' rnnë' néquinë' queë' Cristo, pero runë' dul-la' le lë'e, o rizë ládxi'ë le dë que luzë'ë, o reaj ládxi'ë tu budó' néquini, o rinnë xihuë'ë, o rizúdxinë', o ribanë'. Biti' ca' gágulenli' tsözxön tuë' bönni' caní.

12-13 Biti' nequi quia' neda' uchi'a usöröa' nupa bití' nabábagaca rë'u. Dios uchi'a usöröë' léguequi. Libí'i cázali' ral-la' uchi'a usöröli' nupa nabábagaca libí'ili'. Que lë ni na', guli'cúë' ga zóali' bönni' xihui' na'.

6

Biti' ral-la' ichë'ëru' böchi' luzá'aru' lógaca bönachi yúlahui'

1 Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa bití' ta'yéajlë' Cristo libí'ili'? Dxí'arö tséajli' lógaca bönachi queë' Cristo para ulu'chi'a ulu'sörö libí'ili'.

2 ¿Naru' cabí nözili' nupa néquiguequi queë' Cristo ral-la' ulu'chi'a ulu'sörö yúgu'të bönachi yödzölió? Channö libí'i cázali' uchi'a usöröli' bönachi yödzölió, ¿naru' cabí nápali' yöl-la' réajni'i uchi'a usöröli' didza' bizxaj caní?

3 ¿Naru' cabí nözili' ral-la' uchi'a usöröru' yugu' gubáz lá'ayi? Rúntëro bayudxi uchi'a usöröru' le taca yödzölió ga ni zóaru' na'a.

4 Na'a, channö raca tu le run bayudxi nu uchi'a usörö, lë na' raca yödzölió ni, ¿bizx que rucúa'ali' nupa ulu'chi'a ulu'sörö le, nupa na' biti' bi dë lu në'eguequi ladjagaca bönachi queë' Cristo?

5 Rnnía' caní para guna' ga utuí'ili'. ¿Naru' cabí zóalen libí'ili' nu raca lati' nu gaca uchi'a usörö le raca quégaquië' böchi' luzá'ali'?

6 ¿Nacxi caz gaca tu bönni' réajlë'ë Cristo ichë'ë böchi' luzë'ë yulahui' ga ulu'chi'a ulu'sörö bönachi biti' ta'yéajlë' Cristo légaquië'?

7 Le nácatë richixi riníguili' tu' ridil-la dídza'li'. ¿Bizx que biti' guá' ilenli' nu ruá' dö' queéli'? ¿Bizx que biti' guá' ilenli' nu rucáchi'lan le dë queéli'?

8 Libí'ili' ruá'ali' dö', en rucachi' lanli', ate' runli' caní quégaquië' böchi' luzá'ali' ta'yéajlë'ë Cristo.

9-10 ¿Naru' cabí nõzili' biti' ila'yaza bönachi biti' nácagaca tsahui' ga rinná bë'ë Dios? ¡Biti' si' ye'e cuinli'!

Biti' ca' tsaz ga rinná bë'ë Dios nu run le ruá' dö':
Cuntu nu reaj ladxi' budó' guió'j budó' yaga,
en cuntu nu riguitsaj xibá que yöl-la' nutsaga na',
en cuntu nu bönni' run cuinë' ca nigula,
en cuntu nu bönni' zóalenë' la' luzë'e bönni'së',
en cuntu nu bönni' gubán, en cuntu nu ruhuidi',
en cuntu nu rizudxi, en cuntu nu rinnë xihui',
en cuntu nu rucáchi'lan.

Biti' ca' tsaz nu run caní ga rinná bë'ë Dios.

11 Caní gúcali' bál-lali' libí'ili', pero na'a chin-uhuóacali' dxi'a que dul-la' gubága'li', en chinéquili' quez queë' Dios, en chinuhuóacali' tsahui' ni'a que le benë' Xanru' Jesús. Bö' Lá'ayi queë' Dios runë' ga raca caní.

Idütë le naca cázaru' nequi quez queë' Dios

12 Ta'nná bönachi: "Yúgu'tè dë lataj gunru'." Sal-la' nácatè didza' ni, biti' ral-la' gunru' yúgu'tè. Sal-la' dë lataj guna' yúgu'tè, biti' gu'a lataj bi inná be'e neda'.

13 Ta'nná ca' bönachi: "La' huagu naca le tsaz lë'ëru', ate' lë'ëru' naca ga tsudzu la' huagu." Nácatè didza' ni, pero idxín dza usunítië' Dios la' huagu, enca' lë'ëru'. Dios benë' idútè le naca cázaru', calëga para ugunru' le dxin gunru' le ruá' dö'. Naca para uzi'ë xibë Xanru', ate' Xanru' náquië' para uzí' xibë' idútè le naca cázaru'.

14 Dios busubanë' Xanru' Cristo lu yöl-la' guti. Lësca' caní, len yöl-la' huáca queë' usubanë' rë'u.

15 ¿Naru' cabí nözili', idútè le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¡Biti' ca' ral-la' gunli' caní!

16 ¿Naru' cabí nözili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rnna: "Ilácagaquië' ca tuz bönachi iropë' na'."

17 Na'a, nu bönni' náquië' tuz len Xanru', náquië' tuz len Lë' lu bö' naca cazë'.

18 Que lë ni na', biti' ca' gunli' le ruá' dö'. Bítitës dul-la' yúbölö runë' tu bönni', ní'ilö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'.

19 ¿Naru' cabí nözili' idútè le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' libí'ili', ate' Lë' zoë' icja ládxi'do'oli'. Que lë ni na' biti' nequi queëzili' idútè le naca cázali'. Na'a, nequi queë' Dios.

20 Dios gú'uë' libí'ili' len tu le zxön le gudizxjë'.

Guli'gún dxin idútë le nácali', enca' bö' naca cázali' para gaca queë' Dios yöl-la' ba, tu' néquiguequi queë' Dios idútë le naca cázali', enca' bö' naca cázali'.

7

Rusëdinë' Pablo ca naca que yöl-la' nutsaga na'

¹ Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula.

² Tu' tunda' bönachi le ruá' dö' ga ni' zóali', yúgu'të bönni' nabábagaquië' libí'ili' ral-la' ila'cuá'lenë'-nu nigula que queëgaquië', ate' yúgu'të nigula ral-la' ila'cuá'lennu-në' bönni' que queégacanu.

³ Bönni' na' zóanu nigula queë' ral-la' gunë' queënu nigula queë' ca naca yöl-la' run que yöl-la' nutsaga na', en la' lëbisö ral-la' gunnu nigula len bönni' queënu.

⁴ Biti' dë lu ná'asönu nigula le naca cázanu, pero bönni' queënu dë lu në'ë ca' le. Lësca' caní, bití' dë lu ná'asë' bönni' le naca cazë', pero nigula queë' dë lu ná'anu ca' le.

⁵ Biti' ral-la' ila'dá'baguë'ë luzá'agaquië' bönni', en nigula na', nutsaga ná'agaquië'. Huácasö ca' channö ilunë' tuz didza' bití' ila'dzáguië' tu chí'isö para gaca ulu'lidzë' Dios idú lách'agaquië'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xihui' gun ga tsázagaquië' nōza dul-la' tu' cabí gaca ila'nná be'e cuíngaquië'.

⁶ Lë ni rea' libí'ili' naca tu le runnë' Xanru' libí'ili' lataj. Biti' naca le gunná bë'ë.

⁷ Runi neda' gácarö dxi'a ulu'gá'anë' tuz yúgu'të bönni', ca na' zoa' tuza' neda'. Tu tuë' bönni' rizi'ë tsca le runödzejë' Dios queë' gunë'. Tuë' rizi'ë tu le runödzejë', ate' ia'tué' rizi'ë ia'tú le runödzejë'.

⁸ Na'a, rea' nupa zóagaca tuz, enca' yugu' nigula uzëbi, gácarö dxi'a quéguequi ulu'gá'ana tuz ca na' zoa' tuz neda'.

⁹ Channö cabí gaca ila'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ila'zé ládxi'gaquië' le ruá' dö'.

¹⁰ Rinná bé'eda' nupa chinutsaga në'eguequi, en calëga néda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queënu."

¹¹ Channö nu nigula ulá'alennu-në' bönni' queënu, ral-la' ugá'ananu túzinu, o huóácanu tuz len bönni' queënu na'. Lësca' caní tu bönni' bití ral-la' ucá'anë'-nu nigula queë'.

¹² Na'a, néda'sö rea' ia'zica'rö bönachi, en calëga rnnë' Xanru' caní, rnnía': Channö zoë' nu böchi' luzá'aru' réajlë'ë Cristo, ate' nigula queë' bití réajlë'ënu Xanru', en channö ré'ëninu ugá'analennu lë', bití ral-la' ulá'alennë'-nu.

¹³ Lësca' caní rnnía': Channö zóanu nu nigula zanru' réajlë'ënu Cristo, ate' bönni' queënu bití réajlë'ë Xanru', en channö ré'ënnë' ugá'analennë'-nu, bití ral-la' ulá'alennu lë'.

¹⁴ ¡Caní ral-la' ilunë'! Bönni' cabí réajlë'ë na', Dios rilé'enë' lë' ca tu bönni' néquinë' quez queë' tu' náquië' tuz len nigula queë' réajlë'ënu Cristo, ate' nigula caní, bití réajlë'ënu, Dios rilé'enë'-nu ca tu nigula néquinu quez queë' tu' nácanu tuz

len bönni' queënu náquië' böchi' luzá'aru' réajlë'ë Cristo. La'tu' cabí naca caní, ilácabi' zxi'inigaquië' ca yugu' bi'i lan lahuë' Dios. Na'a, nácagacabi' quez queë' Dios.

¹⁵ Nu bönni' o nigula nu cabí réajlë' Cristo, channö rë'ëni ulá'alén nu na' nutsaga ná'alén, huáca ca'. Biti' run bayudxi ugá'analen nu na' böchi' luzá'aru' o zanru' nu réajlë' Cristo, tu' bulidzë' Dios rë'u para cözaru' tsáhuí'do'.

¹⁶ ¡Caní ral-la' gaca! Nadxi ca' li', nigula, huáca gunu' ga ulë' bönni' quiu', ate' nadxi ca' li', bönni', huáca gunu' ga ulanu nigula quiu'.

¹⁷ Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzë' Dios rë'u para guéquiru' queë'. Rusédida' yúgu'të cö' bönachi queë' Cristo xibá ni.

¹⁸ Channö Dios bulidzë' nu bönni' narugu lu xipélë'ë le naca bë' néquinë' queë' Dios, ral-la' ugá'anë' caní, zoa lu xipélë'ë lë na' naca bë'. Lësca' caní, channö Dios bulidzë' nu bönni' bití' narugu lu xipélë'ë lë na' naca bë', bití' ral-la' ichúguië' lë na' lu xipélë'ë.

¹⁹ Bití' bi nazaca' lë na' narugu lu xipélë'ë tu bönni', en channö bití' narugu lu xipélë'ë bönni' lë na' naca bë', bití' bi nazaca'. Le nácada' lesaca' naca gunru' ca rinná bë' xibá queë' Dios.

²⁰ Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'.

²¹ Channö bulidzë' li' cate' ni' nacu' bönni' nadó'o, bití' cö'u böniga tu' nacu' caní, pero channö gata' quiu' lataj iruju' lu na' xanu', buzi' xibé lataj na' gata' quiu' iruju'.

²² Channö bulidzë' Xanru' nu bönni' cate' ni'

nado'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo.

²³ Zxöntëro le gudizxjë' Dios, gú'uë' libí'ili'. Que lë ni na' biti' ral-la' guti' cuinli' lu ná'agaca bönachi.

²⁴ Que lë ni na' ca', böchi' luzá'ado', ral-la' sóali' lahuë' Dios tsca guca queëli' tu tuli' cate' ni' bulidzë' Dios libí'ili'.

²⁵ Ca naca quégaca nupa biti' nutsaga ná'agaca, biti' bi gunná bé'enë' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxi'ë Xanru' neda'.

²⁶ Tu' taca zían le raca queëru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca nácaquië' na'a.

²⁷ Channö nutsaga ná'lenu'-nu nigula, biti' ulá'alenu'-nu. Lësca' caní, channö zu' tuzu', biti' quilju' tu nigula para utsaga ná'lenu'-nu.

²⁸ Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'aleni'-në' bönni', biti' gunbi' dul-la', pero ila'guí'i ila'zaca' nupa nutsaga ná'agaca yödzölió ni, ate' ré'ënda' guna' ga uláli' lu yöl-la' riguí'i rizaca' na'.

²⁹ Na'a, rea' libí'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquië'-nu nigula ral-la' iluí' ládxi'gaquië' Dios, ca runë' nu bönni' biti' nutsaga ná'alënë' nigula.

³⁰ Lësca' caní, nupa ta'bödxi yechi' ral-la' ulu'dzeja lahuë' Dios ca run nu biti' ribödxi, ate'

nupa tu'dzeja ral-la' ila'cuá' nöxaj lahuë' Dios ca run nu biti' rudzeja, ate' nupa to'o ral-la' ilaca ca nu biti' bi dë que.

³¹ Nupa tu'gún dxin le dë yödzölió ni ral-la' ilaca ca nu biti' ruí'i ladxi' le dë yödzölió ni, tu' udödi quegaca le rilé'eru' yödzölió ni.

³² Ré'ënda' biti' ubi uguí'ili'. Tu bönni' biti' zóanu nigula queë' ruí'i ládxë'ë le nequi queë' Xanru', naca gunë' le raza ládxë'ë Xanru'.

³³ Tu bönni' nutsaga ná'lenë'-nu tu nigula ruí'i ládxë'ë le raza yödzölió, naca gunë' le raza ládxí'nu nigula queë'.

³⁴ Lësca' caní raza queënu tu nigula nutsaga ná'lennu-në' bönni', en queënu nigula na' zóanu túzinu. Nigula na' zóanu túzinu ruí'i ládxí'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ruí'i ládxí'nu le raza yödzölió ni, naca gunnu le raza ládxë'ë bönni' queënu.

³⁵ Yugu' lë ni rea' libí'ili' para uzí'ili' xibé lë ni, en calëga para uzága'a xinözüli'. Ré'ënda' gunli' le ralla' gunli', para gunli' xichinë' Xanru' idú ládxí'li'.

³⁶ Channö zoë' tu bönni' réquinë' biti' naca dxi'a ugá'anabi' túzibi' bi'i nigula ra'bando' queë', en chizóa iz queébi', en ré'ënidé'ebi' utsaga ná'alénbi'-në' bönni', huáca utsaga ná'alénbi'-në'. ¡Biti' gunbi' dul-la'!

³⁷ Channö chinún tsutsu xtídzë'ë bönni' na', en biti' run bayudxi gunë' caní, en dë lu në'ë naca gunë', en chinún tsutsu xtídzë'ë ugá'anabi' túzibi', gunë' le naca dxi'a bönni' na'.

38 Caní naca, nu ruíi lataj bi'i que utsaga ná'aleni' -nē' bönni', run le naca dxi'a, pero nu run ga ugá'anabi' túzibi' run le nácarö dxi'a.

39 Nigula na' nutsaga ná'lennu-nē' bönni', rinná be'e xibá que yöl-la' nutsaga na' lēnu tsanni ni zoē' nabanē' bönni' queēnu. Channö gátiē' bönni' queēnu, gata' lu ná'anu utsaga ná'lennu-nē' nu bönni' ré'ēninu, channö réajlë'ë Xanru' bönni' na'.

40 Runi neda' gácarönu bica' ba channö ugá'ananu túzinu, en réquida' Bö' Lá'ayi queē' Dios runē' neda' tzazxön.

8

Le ta'gú'u bönachi lógaca budó' guiöj budó' yaga

1 Na'a, gu'a didza' ca naca que le ré'aj ráguru', lē na' gula'gú'u bönachi lógaca budó' guiöj budó' yaga. Ta'nná bönachi: "Yúgu'tēru' náparu' yöl-la' réajni'i." ¡Nácatē didza' ni! Yöl-la' réajni'i caní run ga run ba zxon cuinru', pero yöl-la' nadxí'i queēru' luzá'aru' run ga rácalenru' luzá'aru'.

2 Channö zoē' nu bönni' réquinē' chiréajni'inē', bití' bi réajni'ininē' ca ral-la' tséajni'inē',

3 pero nu bönni' nadxí'inē' Dios, Dios caz zóalenē' bönni' na'.

4 Na'a, ca naca que le ré'aj ráguru', lē na' gula'gú'u bönachi lógaca budó' guiöj budó' yaga, nóziru' bití' bi nazáca'gaca budó' guiöj budó' yaga na' yödzölió ni, en cúnturö nu zoa naca Dios.

5 Sal-la' nacua' le téquiguesqui bönachi nácgaca dios, le nacua' lúzxiba, en le nacua' luyú, ate' zían le tu'lidza bönachi, en tu'i lágaca: dios, enca': xan,

6 pero queēru' ré'u:
Tuzē' náquiē' Dios, Lē' Xuz.

Lë' benë' yúgu'të le rilé'eru',
 ate' zóaru' nabanru' para tseaj ládxi'ru' Lë'.
 Tuzë' náquië' Xanru', Lë' Jesucristo.
 Lu në'ë Lë', Dios benë' yúgu'të le dë,
 ate' nabániru' Lë'.

⁷ Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'aló gula'yéaj ládxi'gaca budó' guiøj budó' yaga, ga ridxintë na'a dza të'aj tahuë' le gula'gú'u bönachi lógaca budó' guiøj budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága'gaquië' xíguia' channö tahuë' lë na'.

⁸ Biti' gun le guí'aj gáguru' ga gunë' Dios rë'u bal. Channö gáguru' le, bití' gácaröru' dxi'a, en channö cabí gáguru' le, bití' gácaröru' cá'asö.

⁹ Dë lu ná'ali' guí'aj gáguli' bití'tës. Guli'gún chi'i cuinli' para cabí gunli' ga ila'chixi ila'nigui nupa bití' naca idú ca ta'yéajlë' Cristo.

¹⁰ Nadxi ca' li' réquinu' napu' yöl-la' réajni'i ca naca lë ni, en huáca gagu' bití'tës. Channö cö'u xilataj budó' guiøj budó' yaga, en guí'aj gagu' le gula'gú'u bönachi lo budó' guiøj budó' yaga na', ate' channö nu böchi' luzó'o bití' naca idú ládxi'ë ilé'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guiøj budó' yaga na'.

¹¹ Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o bití' naca idú ládxi'ë. ¿Naru' guntso' caní queë' böchi' luzó'o, ni'a que nu na' gútië' Cristo?

¹² Channö caní gunu', gunu' dul-la' tu' usubágu'u böchi' luzó'o xíguia', en gunu' ga ichixi iníguinë' tu'

cabí naca idú ládxë'ë, en gunu' ca' dul-la' le ruzóa Cristo tsölá'aló.

¹³ Que læ ni na', channö le guí'aj gahua' gun ga ichixi iníguinë' böchi' luzá'a, bitirö gahua' bëla' na', para cabí guna' ga gunë' böchi' luzá'a dul-la'.

9

Le dë lu në'ë nu bönni' gubáz nasöl-lë'ë Cristo

¹ ¿Naru' cabí naca' gubáz nasöl-lë'ë Cristo? ¿Naru' cabí nadéli'da' yöl-la' rusölá? ¿Naru' cabí bilé'eda-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'?

² Nadxi ca' téquiguequi ia'zíca'rö bönachi bitirö naca' gubáz nasöl-lë'ë Cristo. Libí'ili' run bayudxi guéquili' naca' gubáz queë' Cristo. Tu' nácali' queë' Xanru', le naca cázali' naca bë' naca' gubáz nasöl-lë'ë Xanru'.

³⁻⁴ Nacuá' nupa ta'zír quidza' neda'. Caní rubi'a didza', rea' légaquië': Dë lu na'a inaba' le guí'aj gahua' tu' runa' dxin ni.

⁵ Lësca' caní dë lu na'a utsaga ná'alena'-bi' tubi' bi'i nigula zanru' réajlë'ëbi' Cristo para gunbi' neda' tsözxön ga ridá', ca na' tunë' ia'zíca'rë' gubáz nasöl-lë'ë Cristo, en yugu' bönni' böchë'ë Xanru', enca' Pedro.

⁶ ¿Naru' réquili' tuza' neda', en Bernabé ral-la' guntu' dxin lahui' dza, para idzölitu' le gágutu'?

⁷ ¿Nuzxi caz bönni' rejë' gudil-la, ate' riguizxjë' la' cuinsë'? ¿Nuzxi caz bönni' rudë'ë tu la' yëla que lubá uva, en bitirö rahuë' le ribía lubá na'? ¿Nuzxi caz bönni' rapa chi'ë-ba' bö'cu' zxila', en bitirö re'jë' nidxi' quégacaba'?

⁸ Biti' guéquili' la' néda'sö ruá'a caní didza'. Lësca' caní rna le nazúaj lu guichi lu xibá queë' Moisés.

⁹ Lu xibá queë' Moisés nazúaj lu guichi le rna: Biti' cu'u du rúa'aba' bēdxi cate' rulíbiba' zxoá' xtila. Bē'ē Dios didza' ni, calégasö tu' ruí'i lādxi'ē-ba' bēdxi,

¹⁰ pero para uzí'iru' ca' xibé rē'u. Que lē ni na' nazúaj lu guichi didza' na', ate' bönni' na' rugá'anē'-ba' bēdxi, enca' bönni' na' runē' ga tu'líbiba' bēdxi zxoá' xtila, iropē' na' ral-la' ilunē' löza ila'zi'ē que le rulá' luyú na'.

¹¹ Na'a, channö bentu' dxin ga zóali', le naca ca dxin guz gú'una, lē na' naca queë' Dios Bö' Lá'ayi, ¿naru' réquitseli' bití' ral-la' uzí'itu' xibé tu le do' dē queéli' ca na' ruzi'ē xibé bönni' guz gú'una le rulapē'?

¹² Ia'zica'rö bönachi tu'zējai'ninē' libí'ili' tu'zi'ē xibé le dē queéli'. ¿Naru' cabí rála'terö uzí'itu' xibé netu' le dē queéli'?

Catu caz buzi'tu' xibé lē ni dē lu na'tu', pero biá' gulentu' yúgu'tē para gaca guntu' libán que didza' dxi'a ca naca queë' Cristo.

¹³ Nöz quézili' ca raca quégaca nupa tun dxin que yudo', tu'zí' xibé gun que yudo'. Lësca' caní nupa ta'gú'u rön quégacaba' böa' bēdxi lu bucugu lá'ayi queë' Dios, tahuē' bēla' quégacaba' böa' bēdxi na'.

¹⁴ Lësca' caní nuzóē' Xanru' ca ral-la' gaca quégaquiē' bönni' tunē' libán que didza' dxi'a. Nupa tu'zí' xibé libán na' tunē' ral-la' ulu'gagu légaquiē'.

¹⁵ Neda' catu caz buzi'a xibé lē ni dē lu na'a, ate' lē ni ruzúaja' lu guichi ni bití' naca le rinábini nu bi gunna quia'. Run ba zxön cuina' tu' cabí nazxja'

cate' runa' libán que didza' dxi'a. Guě'ënitëra' gátia' ca gu'a lataj nu innë runa' libán na' tu' nazxja'.

16 Biti' dë lu na'a gun ba zxön cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channö cabí guna' libán que didza' dxi'a.

17 La'tu' runa' libán tu' rë'ëni quézida', huáca inaba' lazxa', pero run bayudxi guna' libán, tu' naca tu le busubáguë'ë Dios neda' guna'.

18 ¿Bizxi lazxa' uzi'tsa' xibé channö? Ruzi'a xibé le raza ládxa'a tu' cabí nazxja' cate' runa' libán que didza' dxi'a. Biti' ca' ruzi'a xibé lë na' dë lu na'a tu' runa' libán que didza' dxi'a.

19 Na'a, sal-la' cuntú nu yu'a lu në'e, chibén cuina' ca tu bönni' nadó'o quégaca yúgu'të bönachi para gaca guna' ga ulu'lágaca zíanrö ca' bönachi.

20 Cate' runa' libán lógaca bönachi judío, run cuina' ca tu bönni' judío para gaca guna' ga ulu'lágaca bönachi judío na'. Bönachi judío na' tun ca rinná bë' xibá queë' Moisés. Que lë ni na' run cuina' ca tu bönni' runë' ca rinná bë' xibá na' sal-la' bití yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'.

21 Cate' runa' libán lógaca bönachi izá'a, nupa bití rinná be'e xibá queë' Moisés léguequi, run cuina' ca tu bönni' zi'tu' na', para gaca guna' ga ulu'lë'. Bití rucá'ana' cá'asö xibá queë' Dios. Neda' runa' ca rinná bë' xibá queë' Cristo.

22 Run cuina' ca tu bönni' bití naca idú ca réajlë'ë Cristo para gaca guna' ga ulu'lágaca nupa na' bití naca idú ca ta'yéajlë' Lë'. Run cuina' ca nácagaca yúgu'të bönachi para gaca guna' ga ulu'lágaca bal-la bönachi na'.

²³ Lu yúgu'të lë ni runa', runa' ga ta'yöni bönachi didza' dxi'a, para gaca uzi'a xibé tsözxön len libí'ili' didza' dxi'a na'.

²⁴ Chinöz quézili' ca tunë' bönni' nútsa'gaquië' lu huitaj. Ta'xíti'ë yúgu'të', pero tuzë' bönni' idéli'në' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nútsa'gaquië' lu huitaj, para idéli'li' uzí'ili' xibé le ubi'ë Dios queéli'.

²⁵ Yúgu'të bönni', cate' tu'pá'a cuíngaquië' para gaca ila'yázië' lu huitaj, ta'nná be'e cuíngaquië' lu yúgu'të le tunë'. Tunë' caní para ila'déli'në' tu bregui' zin le inítitë, pero idéli'ru' rë'u tu le uzí'tica'siru' xibé.

²⁶ Que lë ni na', naca' neda' ca tu bönni' idú ládxë'ë rixíti'ë. Naca' ca' ca tu bönni', idú ládxë'ë ridil-lë'. Biti' rucudxa' lu bö'ös.

²⁷ Ca runë' bönni' na' rulidzë' bönachi para tsöjtsázagaca lu huitaj, runa' ca' neda', runa' libán para ulu'lágaca bönachi. Bönni' na' nútsë'ë lu huitaj runë' ga gaca tsutsu idütë le naca cazë', en rinná bé'enë' le. Lësca' caní runa' neda', para cabí unítia' xilatja' lu dxin queë' Dios.

10

Biti' ral-la' tseaj ládxi'ru' budó' guiöj budó' yaga

¹ Rë'ënda' uzéajni'ida' libí'ili', böchi' luzá'ado', ca guca quégaquië' xuz xtó'otu'. Dios benë' ga gulú'u zxul-la tu böaj yúgu'të'. Lësca' caní, gula'dödë' yúgu'të' gatsaj láchui'lö nísado'.

² Lu böaj ni', en lu nísado' ni', guca quégaquië' ca raca que nu ridila nisa. Lë na' guca quégaquië' guca bë' guláquië' tuz len Moisés.

3 Lësca' caní, gulahuë' yúgu'të' yöta xtildo' na' bunödzejë' Dios Bö' Lá'ayi quégaquië'.

4 Gulé'ajë' yúgu'të' nisa na' bunödzejë' Dios Bö' Lá'ayi quégaquië', tu' gulé'ajë' nisa birúaj lë'e guiöj na' bulu'e lahui Dios Bö' Lá'ayi, guiöj na' gula'báinë' légaquië'. Ca guca guiöj na' naca cazë' Cristo, nabániru' Lë'.

5 Sal-la' guca caní, bití' guyaza ládxë'ë Dios yúgu'të'. Que lë ni na' gulátië' lu lataj cá'asö.

6 Yúgu'të lë ni naca tu le ruzéajni'i rë'u, para cabí së ládxi'ru' le ruá' dö', ca na' gula'zë ládxi'gaquië' légaquië'.

7 Bití' ral-la' tseaj ládxi'ru' budó' guiöj budó' yaga, ca na' gulunë' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulé'aj gulahuë', ate' gula'yasë', en gulunë' laní que budó' na'."

8 Bití' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasö gulátië' idú ca tsonna-uruá' milë'.

9 Bití' ral-la' si' bë'ëru' Xanru', ca na' gula'zí' bë'ë Lë' bal-lë' légaquië', ate' gulátië' tu' guláguya'aba' bëla sínia' légaquië'.

10 Lësca' caní, bití' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítië' légaquië'.

11 Yúgu'të lë ni le gulaca quégaquië' xuz xtó'otu', tu'zéajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yödzölió ni.

12 Que lë ni na', nu réqui chinal-la, ral-la' gun chí'i cuini, para cabí ichixi inigui.

13 Ca naca le ta'zí' bē' libí'ili' raca ca' quéguequi yúgu'tē bōnachi. Dios runē' ca rnnē', en biti' gu'ē lataj bi si' bē' libí'ili' le cabí gaca guá' ilenli', pero cate' bi si' bē' libí'ili', ulu'ínē' libí'ili' naca gaca irúajli' lu na' tu' xihui', para gaca guá' ilenli'.

14 Que lē ni na', bōchi' luzá'ado', biti' tseaj ládxi'li' budó' guiōj budó' yaga.

15 Ru'ílēna' libí'ili' didza' ca ru'ílēna' didza' nupa ta'yéajni'i. Buli'chí'a buli'soró didza' ni gu'a.

16 Cate' inábiru'-nē' Dios gun lá'ayē' le rē'ajru' cate' rusubanru' ca gútiē' Cristo, lē na' rē'ajru' rulu'í nácaru' tuz len Cristo, en ruzí'iru' xibé le benē' Cristo cate' bulaljē' xichōnē' cate' gútiē' lē'e yaga cruz. Lēscá' caní, yōta xtila na' ruzxúzxjaru', en ráguru', rulu'í dzágaru'-nē' Cristo, en ruzí'iru' xibé le benē' Cristo cate' budödē' idútē le naca cazē' uláz queéru'.

17 Sal-la' zianru' nácaru', yúgu'tēru' ráguru' tuz yōta xtila na', en que lē ni na' nácaru' ca tuz bōnachi.

18 Buli'yútsōca' ca tunē' bōnni' Israel. Bōnni' ni' tahuē' lahuē' Dios le ta'gu'ē lu bucugu lá'ayi queē', lē na' tahuē' rulu'í dzágagaquiē' Dios.

19 ¿Bizxi rnna didza' ni ruá'a? Biti' rnnía' napa budó' guiōj budó' yaga yōl-la' huáca, en le ta'gú'u bōnachi lógaca budó' guiōj budó' yaga na' biti' napa yōl-la' huáca.

20 Caní rnnía': Lē na' ta'gú'u bōnachi biti' núnbē'gaquiē' Dios lógaca budó' guiōj budó' yaga, ta'gú'u lógaca bō' xihui', en calēga lahuē' Dios. Rē'ēnda' biti' idzágalí' yugu' bō' xihui'.

21 Biti' gaca guí'jali' le rulu'í nácaru' tuz len Xanru', enca' lē na' ulu'í nácali' tuz len yugu'

bö' xihui'. Biti' gaca gáguli' le rulu'i dzágaru'-në' Xanru', enca' le ulu'i dzágali' yugu' bö' xihui'.

²² ¿Naru' gúntsaru' ga uzxé'enë' Xanru'? ¿Naru' réquitseli' nápatëroli' yöl-la' huáca ca napë' Lë'?

Le dë lu ná'aru' gunru', en ca ral-la' idxí'igacru'-në' böchi' luzá'aru'

²³ Naca idütë li didza' na' rnna: “Yúgu'të dë lu ná'aru' gunru'.” Na'a, neda' rnnía': Calëga yúgu'të ral-la' gunru'. Yúgu'të dë lu ná'aru' gunru', pero calëga yúgu'të gun ga gácarö idú ca réajlë'ëru' Cristo.

²⁴ Ral-la' güi'íládxí'ru' gunru' le gun ga gaca dxi'a quëgaquië' böchi' luzá'aru', en calëgasö le gun ga gaca dxi'a que la' cuínsiru'.

²⁵ Bítí'tës bi tuti' bönachi lu yë'ëyi, huáca gáguli', en biti' bi ral-la' inábali' que, para cabí cuéqui böniga ládxí'do'oli'.

²⁶ Nazúaj lu guichi le rnna: “Queë' Xanru' nequi yödzölió ní, enca' yúgu'të le dë yödzölió ní.”

²⁷ Channö ulidzë' tu bönni' biti' réajlë'ë Dios libí'ili' para guídali' lidxë', ate' guë'ënili' tséajli', guli'gagu yúgu'të le cu'ë loli', en biti' bi inábali' que, para cabí cuéqui böniga ládxí'do'oli'.

²⁸ Channö nútí'tës nu guíë libí'ili': “Lë ni gula'gu'ë lo budó' guiöj budó' yaga”, biti' gáguli' lë na' para gaca dxi'a que nu na' gudíxjöi'í caní libí'ili', en para cabí cuéqui böniga ládxí'da'ahuë'.

²⁹ Rnnía': Para cabí cuéqui böniga ládxí'da'ahuë' bönni' na' gudíxjöi'inë' caní libí'ili', en calëga para cabí cuéqui böniga ládxí'do'oli' libí'í cázali'.

Nadxi ca' nu inábini neda', inná: "¿Bizx que ralla' uzóa' tsölá'alö le dë lu na'a guna' tu' ribequi böniga ládxi'da'ahuë' bönni' yúböló?"

³⁰ Huáca inná ca' nu na': "Channö guía'-në' Dios: Xclenu', ni'a que lë na' rahua', ¿bizx que nu uzegui neda' didza' ni'a que lë na' rahua'?"

³¹ Channö bi gáguli' o bi guí'jali', o bítitës bi gunli', guli'gún yúgu'të para gaca queë' Dios yöl-la' ba.

³² Biti' bi gunli' le gun ga ila'chixi ila'nigui bönachi judío, en biti' gunli' le gun ga ila'chixi ila'nigui bönachi biti' nácagaca judío, en biti' gunli' le gun ga ila'chixi ila'nigui bönachi queë' Dios.

³³ Guli'gún ca runa' neda'. Ruí'i ládxa'a guna' le ila'yaza ládxi'gaca yúgu'të bönachi, en biti' ruí'i ládxa'a guna' le uzi'a xibé la' néda'sö, pero le ulu'zí xibé ia'zíca'rö bönachi para ulu'lágaca.

11

¹ Guli'gún ca runa' neda', ca na' neda' ca' runa' ca benë' Cristo.

Le tunnu nigula lógaca bönachi queë' Cristo

² Runa' libí'ili' zxön, böchi' luzá'ado', tu' röjnética'sili' neda', en nazí' lu ná'ali' xibá budöda' lu ná'ali'.

³ Na'a, rë'ënda' tséajni'ili' rinná bé'enë' Cristo yúgu'të bönni', ate' bönni' rinná bé'enë'-nu nigula, ate' Dios rinná bé'enë' Zxí'inë', Bönni' na' náquië' Cristo.

⁴ Channö tu bönni' rulidzë' Dios, o ru'ë didza' uláz queë' Dios, en dxía icjë' xilu'ë, rucá'anë' Cristo cá'asö.

⁵ Na'a, channö tu nigula rulídzanu Dios, o ruí'inu didza' uláz queë' Dios, en bití' bi zxoa ícjanu, rucá'ananu bönni' queënu cá'asö, en naca queënu ca naca queënu tu nigula narugu guitsa' ícjanu.

⁶ Channö tu nigula cabí bi zxoa ícjanu, ral-la' irugu ca' guitsa' ícjanu. Channö gun ga utuí'inu nigula na' channö nu chugu guitsa' ícjanu, ral-la' bi ixóa ícjanu.

⁷ Tu bönni' bití' bi ral-la' udxía icjè' cate' ridxinè' lahuè' Dios, tu' náquiè' ca naca cazè' Dios, ate' lè na' náquiè' bönni' ruluí'i lahui yöl-la' zxön queë' Dios, pero le nácanu nigula na' ruluí'i lahui yöl-la' zxön queë' bönni' queënu.

⁸ Cate' benè' Dios bönachi, bití' bubéajè' bönni' na' lu nigula. Nigula na', lu bönni' na' bubéajè'-nu.

⁹ Lësca' caní, bití' benè' Dios bönni' para uzí'inu xibé' nigula, pero benè' nigula para uzi'è xibánu bönni'.

¹⁰ Que lè ni na', nigula na' ral-la' ixóa ícjanu le ruluí'i zoa nu rinná be'e lènu tu' tu'yúè' gubáz lá'ayi queë' Dios rè'u.

¹¹ Na'a, lahuè' Xanru', tu bönni' riquinnè'-nu nigula queë', ate' nigula na' riquíninu-nè' bönni' queënu.

¹² Ca na' benè' Dios, bubéajè'-nu nigula lu bönni', lësca' caní na'a, yúgu'tè bönni' náljlengaquiè'-nu nigula, ate' yúgu'tè rirúaj lu nè'è Dios.

¹³ Buli'chi'a buli'sörö la' libí'isili'. ¿Naru' ral-la' ulídzanu-nè' Dios tu nigula bití' bi zxoa ícjanu?

¹⁴ ¿Naru' cabí rusèdi libí'ili' yöl-la' nácatè quégaca bönachi, ral-la' utuí'inè' bönni' na' ru'è lataj itunna guitsa' icjè'?

15 Na'a, channö natúnna guitsa' ícjanu tu nigula, naca yöl-la' lachi queënu, tu' bë'ë Dios queënu guitsa' ícjanu para usubín ícjanu.

16 Channö zoa nu guë'ëni tá'baga' didza' ni, canísö nazí' lu na'tu' runtu', en lëbisö tun yugu' cö' bönachi queë' Dios.

Bönachi Corinto tu'cá'ana cá'asö le rë'aj ráguru' para usubanru' ca gútië' Xanru'

17 Biti' runa' libí'ili' bal ca naca le uzéajni'ida' libí'ili' na'a. Le runli' biti' run ga raca dxi'a queéli' cate' rudúbili' queë' Cristo, pero run ga raca queéli' le cabí naca dxi'a.

18 Risí lahua' ruzéajni'ida' libí'ili' lë ni ta'guíxjö'i bönachi neda', ta'nná: "Cate' rudúbili' queë' Cristo, narúajli' choplö", ate' réajlë'a nadxi ca' naca caní.

19 Run bayudxi ila'cuá'alén libí'ili' nupa tu'sedi le cabí nácatë para ilaca bë' nupa nácacaca idú bönachi queë' Cristo.

20 Que lë ni na', cate' rudúbili', lë na' ráguli' tsözxön biti' naca le rë'aj ráguru' para usubanru' ca gútië' Xanru'.

21 Caní naca, tu' runli' bayudxi tu tuli' ráguli' le nuá'ali' que queéli' cate' ráguli' tsözxön, ate' que lë ni na' ridunli' bál-lali', ate' ia'bál-lali' rë'aj ráguli' ga ridxintë rizúdxili'.

22 ¿Naru' cabí zoa lídxili' ga huáca gu'aj gáguli'? Ca na' runli', rucá'anali' bönachi queë' Dios cá'asö, en runli' ga tu'tuí' nupa biti' bi dë quéguequi. ¿Bizxi caz guía' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lë ni runli'.

Le rë'aj ráguru' para usubanru' ca gútië' Xanru'

23 Xanru' caz budödë' lu na'a lë na' busédida' libí'ili', ca na' benë' Xanru' Jesús yëla ni' cate' nu budödi Lë' lu ná'agaquië' bönni' gulútië' Lë'. Gudélë'ë yöta xtila,

24 en cate' budxi gudxë' Dios: "Xclenu'", buzx-uzxjë' le, en gunné': "Guli'gagu. Lë ni naca xipëla'a le nayuzxaj uláz queéli'. Guli'gún caní, para usubanli' ca gaca quia' neda'."

25 Lësca' caní, gudödi gulahuë', gudélë'ë tu zxíga'do', en gunné': "Le yudzu zxíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'."

26 Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxíga'do' caní, uluí'ili' lahui ca gútië' Xanru'.

Ca ral-la' gunru' cate' guí'aj gáguru' para usubanru' ca gútië' Xanru'

27 Que lë ni na', núti'tës nu gagu yöta xtila ni o guí'aj que le yudzu zxíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipélë'ë Xanru', enca' xichönë' cá'asö.

28 Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu zxíga'do' ni.

29 Núti'tës nu rë'aj ragu lë ni, en biti' run le bal tu' cabí réquibe'e ruluí'i le guca queë' Xanru', rusubaga' cuini dul-la' ni'a que lë na' rë'aj ragu.

30 Que lë ni na' te'e zían nupa dzágagaca libí'ili', en ta'cuídi', ate' ziónguequi chinátigaca.

³¹ La'tu' uchi'a usöröru' la' cuínsiru', biti' uchi'a usöröë' Xanru' rë'u.

³² Channö gun bayudxi uchi'a usöröë' Xanru' rë'u, usaca' zi'ë rë'u, para cabí irugu queëru' cate' ichúguië' quéguequi bönachi yödzülió ilátigaca.

³³ Que lë ni na', böchi' luzá'ado', cate' udúbili' para gu'aj gáguli' para usubanli' ca gútië' Xanru', guli'cöza luzá'ali'.

³⁴ Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lë na' cate' uduyúa' libí'ili'.

12

Yugu' yöl-la' huáca runnë' queëru' Dios Bö' Lá'ayi

¹ Na'a, böchi' luzá'ado', rë'ënda' tséajni'ili' ca zeaj naca yöl-la' huáca runnë' queëru' Dios Bö' Lá'ayi.

² Nöz quézili' ca guca cate' ni' biti' réajlë'ënili' Cristo, bë'ëli' lataj gula'ché' bönachi libí'ili' ga yúbölö. Guyéaj ládxi'li' budó' guiöj budó' yaga, le cabí ta'nnë.

³ Que lë ni na', ruzéajni'ida' libí'ili' caní, rnnía': Ladaj yúgu'të nupa tu'i didza' uláz queë' Bö' Lá'ayi queë' Dios, cuntú nu gaca innë xihui' queë' Jesús, en nitúë' gaca innë: "Jesús náquië' Xanru'", channö cabí zóalenë' Dios Bö' Lá'ayi nu na'.

⁴ Na'a, nadzá'gaca tu tu le runnë' Dios Bö' Lá'ayi queëru', pero tuzë' náquië' Bö' Lá'ayi na'.

⁵ Lësca' caní, nadzá'gaca tu tu dxin rigü'ë Xanru' lu ná'aru', pero tuzë' náquië' Xanru' na'.

⁶ Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu

na' runna yöl-la' huáca na' queëru' para gunru' xichinë'.

⁷ Dios runnë' que queëru' tu le naca bë' náparu' yöl-la' huáca queë' Dios Bö' Lá'ayi, lë na' ruzí'iru' xibé yúgu'tëru'.

⁸ Dios Bö' Lá'ayi runödzjë' queë' tu bönni' yöl-la' huáca ru'ë didza' len yöl-la' rácada', ate' ia'tué' bönni', Lë cazë' Bö' Lá'ayi runödzjë' queë' yöl-la' huáca ru'ë didza' lu yöl-la' réajni'i.

⁹ Lësca' caní, Lë cazë' Dios Bö' Lá'ayi na' runödzjë' queë' ia'tué' bönni' yöl-la' réajlë' Cristo bi gunë', ate' ia'tué' bönni' runödzjë' queë' yöl-la' huáca ruúnë' nupa te'e.

¹⁰ Ia'tué' bönni' runödzjë' queë' yöl-la' huáca runë' yugu' yöl-la' huáca que yehua' yubá, ate' ia'tué' bönni' ru'ë lë' lataj ru'ë didza' uláz queë' Dios, ate' ia'tué' bönni' runödzjë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzjë' queë' ia'tué' bönni' yöl-la' huáca ru'ë didza' yúbölö le cabí nazëdë', ate' queë' ia'tué' bönni' yöl-la' huáca rudödë' didza' yúbölö na' biti' nazëdë'.

¹¹ Yúgu'të lë ni runë' Lë cazë' Dios Bö' Lá'ayi, tu' runödzjë' que tu tu bönachi tsa rë'ëni quézinë'.

Yúgu'tëru' nácaru' ca tuz bönachi

¹² Ca na' naca tuz idútë le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácacaca tuz idútë le naca cázaru', lësca' caní naca queë' Cristo.

¹³ Tu' zóalenë' Lë cazë' Dios Bö' Lá'ayi rë'u, lë ni naca queëru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni'

judío, en yugu' bönni' zi'tu', enca' yugu' bönni' nadó'ogaquië', en yugu' bönni' biti' nadó'ogaquië'. Yúgu'tëru', Dios bë'ë rë'u lataj sí'iru' le runödzja cazë' Bö' Lá'ayi.

14 Na'a, lu idútë le naca cázaru', zían le nagudi' dzágalenru', en calëga tuz.

15 La'tu' huáca gü'i didza' ní'aru', huanná: "Tu' cabí naca' në'ë bönni', biti' néquida' queë'", didza' ni biti' gun ga biti' nequi queë' bönni' na'.

16 La'tu' huáca gü'i didza' nágaru', huanná: "Tu' cabí naca' guiöj lahuë', biti' néquida' queë' bönni' ni", didza' ni biti' gun ga biti' nequi queë' bönni' na'.

17 La'tu' naca guiöj loru' idútë le naca cázaru', ¿nacxi gaca yöniru'? La'tu' naca nágaru' idútë, ¿nacxi gaca ilé'e zxína'ru'?

18 Na'a, Dios nucu'ë yúgu'të le nagudi' dzágalenru' ca gú'uni quézinë' Lë'.

19 La'tu' naca tuz le nagudi' dzágalenru', bíti'rö soa idú ca naca cázaru'.

20 Na'a, ca nácaru', zían le nagudi' dzágalenru', pero tuz le nácaru'.

21 Que lë ni na', guiöj loru' biti' gaca guié ná'aru', inná: "Biti' riquinda' li'." Lëasca' caní, ícjaru' biti' gaca guié ní'aru', inná: "Biti' riquinda' libí'ili'."

22 Na'a, yugu' le nagudi' dzágalenru', lë na' réquiru' nácacagarö cuídi'sö, lë ni naquíniröru'.

23 Lëasca' caní, yugu' le nagudi' dzágalenru', le réquiru' nácacagarö cá'asö, lë ni rugácuröru' dxi'a, en yugu' le réquiru' biti' ral-la' ilá' lahui, rugácuröru' ca' dxi'a.

24 Biti' run bayudxi gunru' caní que le nácarö lachi que le néquíniru'. Dios benë' idútë le naca

cázaru', en benë' ga nácarö lesaca' lë na' réquiru' rë'u nácarö cá'asö.

²⁵ Caní benë', ate' biti' narúajgaca choplö le nagudi' dzágalenru', tu' tun chi'i luzë'eguequi tu ia'tú.

²⁶ Channö gaca zi' tu le néquiniru', ilaca zi' tsözxön len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu'zí xibé tsözxön le.

²⁷ Na'a, libí'i cázali' dzágali' idútë le naca cazë' Cristo, ate' tu tuli' nácali' ca yugu' le nagudi' dzágalenë'.

²⁸ Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo. Ga naca buropi nucu'ë yugu' bönni' tu'ë didza' uláz queë'.

Ga bunni nucu'ë yugu' bönni' tu'sédinë' luzá'aru'. Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'luí'inë' rë'u dxin gunru'.

Ní'irö nucu'ë yugu' bönni' tu'ë didza' yúbölö biti' nazédagaquië'.

²⁹ Calëga yúgu'të' nácagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

³⁰ Calëga yúgu'të' dë lu ná'agaquië' ulu'ünë' nupa te'e.

Calëga yúgu'të' tu'ë didza' yúbölö biti'
nazëdagaquië'.

Calëga yúgu'të' tu'dödë' didza' yúbölö biti'
nazëdagaquië'.

³¹ Guli'gúi' ládxi'li' cu'ë Dios lu ná'ali' yugu' yöl-la'
huáca na' nácacarö lesaca'. Na'a, uluí'ida' libí'ili'
tu le nácarö lesaca' ca yúgu'të' lë ni.

13

Yöl-la' nadxí'i

¹ Sal-la' gaca gu'a xtídza'gaca bönachi le cabí
nazëda', enca' xtídza'gaquië' gubáz lá'ayi queë'
Dios, pero channö cabí nadxí'ida' luzá'a, didza'
gu'a biti' gácarö lesaca' ca bö le run gui rucódxiru'
o guíë rutil-laru' luzë'e.

² Sal-la' nazi' lu na'a gu'a didza' uláz queë' Dios
en tséajni'ida' yúgu'të' le nagachi', en yúgu'të' didza'
réajni'i, en sal-la' naca idú ca réajlë'a Dios ga
ridxintë huáca cúa' yugu' guí'a, pero channö cabí
nadxí'ida' luzá'a, biti' bi nazáca'a.

³ Sal-la' quisia' idütë le dë quia' para ugahua'
yugu' bönachi yechi', en sal-la' udöda' idütë le naca'
ga ulu'zegui bönachi le tu' réajlë'a Cristo, pero
channö cabí nadxí'ida' luzá'a, biti' ca' uzi'a xibé lë
na' runa'.

⁴ Nu bönni' nadxí'inë' luzë'ë, ribözë' zxön ladxi'.

Náquië' dxi'i ladxi', en biti' ruzxé'enë' luzë'ë.

Nadxí'inë' luzë'ë idú ládxe'ë.

Biti' run ba zxön cuinë', en biti' run cuinë' lo.

⁵ Biti' runë' le ruá' dö'.

Biti' rudúli'në' le dë queë'.

Biti' rilétenë', en biti' röjnenë' dö' gulu'i bönachi
queë'.

⁶ Biti' ca' rudzéjanë' cate' nu run le ruá' dö'.

Rudzéjanë' cate' nu run le naca idútë li.

⁷ Ruá' rilenë' bíti'tës bi gun luzë'ë queë'.

Réajlë'tica'së' luzë'ë.

Rúntica'së' löza gun luzë'ë le naca dxi'a.

Ribözatica'së' zxön ladxi'.

⁸ Bíti'rö tödi que yöl-la' nadxí'i. Huadödi que le dë lu ná'agaca bönachi iluí'i didza' uláz queë' Dios. Huadxín dza cate' bíti'rö gata' lu ná'agaca bönachi iluí'i didza' yúbölö le cabí nazëdagaca, ate' huadödi que yöl-la' réajni'i quéguequi bönachi.

⁹ Láti'do'os réajni'iru' na'a, en láti'do'os ca' ru'iru' didza' uláz queë' Dios.

¹⁰ Cate' idxín le naca idú, ní'irö údxi que lë na' naca láti'do'os.

¹¹ Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ládxa'a ca bí'ido'. Cate' bigula' buca'ana' le nequi que bí'ida'ahua'.

¹² Na'a le rilé'eru' naca ca le rilé'eru' cate' ruyú cuinru' tu lu guié dxíido'. Biti' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'ë neda'.

¹³ Na'a, nacuá'tica'sö yöl-la' réajlë' queëru' Dios, en yöl-la' run löza queëru' Dios, en yöl-la' nadxí'i queëru' luzá'aru'. Nacuá' yonna ni, pero le naca lo naca yöl-la' nadxí'i.

14

Yugu' yöl-la' huáca runnë' queëru' Dios Bö' Lá'ayi

¹ Guli'gún bayudxi idxí'ili' luzá'ali', en guli'güi' ládxi'li' sí'ili' ca' yugu' yöl-la' huáca runnë' queëru'

Dios Bö' Lá'ayi, en le naca lo, yöl-la' huáca gü'ili' didza' uláz queë' Dios.

² Nu ruí'i didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntú nu zoa réajni'i didza' ruí'i nu na'. Dios Bö' Lá'ayi ru'ë nu na' lataj ruí'i didza' ca nácagaca le nagachi' queë' Dios.

³ Nu na' ruí'i didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutipa ládxi'guequi, en ruhuë tsahui' léguequi.

⁴ Nu na' ruí'i didza' yúbölö le cabí nazëda run tsutsu la' cuinsi, pero nu ruí'i didza' uláz queë' Dios run tsutsu yúgu'të bönachi queë' Cristo.

⁵ Raca ládxa'a gü'ili' didza' yúbölö le cabí nazëdali' yúgu'tëli', pero le naca lo, rë'ënda' gü'ili' didza' uláz queë' Dios. Ruzí'iröru' xibé nu ruí'i didza' uláz queë' Dios ca ruzí'iru' xibé nu ruí'i didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo.

⁶ Que lë ni na', böchi' luzá'ado', cate' guída' ga zóali', channö gü'ilena' libí'ili' didza' yúbölö le cabí nazëda', bití' bi uzí'ili' xibé. Uzí'isili' xibé didza' na' gü'ilena' libí'ili' le nulu'inë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

⁷ Lësca' caní raca que le ta'gú'u bö, yugu' le cabí nabángaca, ca naca gui rucódxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilö le tul-la na', lë na' rul-la gui na', o guitarra na'?

⁸ Channö cabí cödxí ca ral-la' gun lúzuba' böa' na' ulidza rë'u lu gudil-la, ¿nuzxi caz upá' cuini para

tseaj lu gudil-la na'?

⁹ Lësa' caní raca queéli'. Channö len lúdxí'li' güí'ili' didza' le cabí taca bönachi, bití' ca' ila'yéajni'i didza' güí'ili'. Caní gaca, nítisö güí'ili' didza'.

¹⁰ Le nácatë nacua' zían didza' yúbölö tu'i zían cö' bönachi izá'a lu yödzölió ni, ate' nacua' bönachi ta'yéajni'i tu tu didza' na'.

¹¹ Na'a, channö cabí réajni'ida' didza' ru'ë tu bönni', gaca' ca tu bönni' zi'tu' lahuë' bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zi'tu'.

¹² Lësa' caní naca queéli'. Ruí'ida' ládxi'li' sí'ili' yugu' le runnë' queëru' Dios Bö' Lá'ayi. Que lë ni na', guli'güí' ládxi'li' sí'ili' le ilún ga ilácarö tsutsu bönachi queë' Cristo.

¹³ Que lë ni na' ca', nu ruí'i didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le ré'ëni inná didza' na' ruí'i nu na'.

¹⁴ Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni'i quia' bití' ruzi'a xibé didza' na' ruá'a.

¹⁵ ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni'i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba.

¹⁶ Channö lu bö' naca cazu' rulidza lá'ayu'-në' Dios, ate' zoa ni' nu riyönisö, channö cabí réajni'i didza' ru'u, ¿nacxi caz gaca inná: "Ca' gaca", ni'a que didza' ru'u, ré'u-në' Dios: "Xclenu"?

¹⁷ Nadxi ca' dxí'ado' ru'u didza', ré'u-në' Dios: "Xclenu'." Channö cabí réajni'i didza' ru'u, bití' bi

uzi' xibé nu na' riyöni.

¹⁸ Rea'-në' Dios: "Xclenu", tu' ruí'ira' didza' yúbölö le cabí nazëda' ca yúgu'tëli'.

¹⁹ Lógaca bönachi queë' Dios guë'ënitëröda' gu'a gáyu'sö didza' le gaca ila'yéajni'i bönachi ca zían gayuá' didza' yúbölö le cabí nazëda', ate' cuntu nu gaca tséajni'i. Gaca usédida' ia'zíca'rö bönachi tuzi channö ila'yéajni'i didza' gu'a.

²⁰ Böchi' luzá'ado', biti' gácali' ca bí'ido' ca naca le rizá' ládxi'li'. Guli'gaca ca bí'ido' para cabí gunli' le ruá' dö', pero guli'gaca bönni' chinácagaca ca naca le rizá' ládxi'li'.

²¹ Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a güi'ilena' bönachi ni didza'. Sal-la' guna' caní, biti' ulu'zë nágagaca xtídz'a'a." ¡Caní rnnë' Xanru'!

²² Caní naca, Dios ru'ë rë'u lataj ruí'iru' didza' yúbölö le cabí nazëdaru' para gaca tu le naca bë' lógaca bönachi biti' ta'yéajlë', en calëga lógaca nupa ta'yéajlë' Cristo. Ru'ë rë'u lataj ruí'iru' didza' uláz queë' Lë' le ulu'zí' xibé nupa ta'yéajlë' Cristo, en calëga bönachi na' biti' ta'yéajlë'.

²³ Que lë ni na', cate' udúbili' tsözxön, yúgu'tëli' na' néquili' queë' Cristo, channö güi'ili' didza' yúbölö le cabí nazëdali' yúgu'tëli', ate' tsázagaca nupa nazëdagaca láti'do'os, o nupa biti' ta'yéajlë' Cristo, ¿naru' cabí ila'nná: "Nachixi ícjali'?"

²⁴ Na'a, channö yúgu'tëli' güi'ili' didza' uláz queë' Dios, ate' tsaz nu cabí réajlë' Cristo o nu nazëda láti'do'os, guéquibe'e nu na' nabaga' xíguia', ate' Dios uchi'a usöröë' lë'. Caní guéquibe'e nu na', tu' tseajni'i didza' güi'ili' yúgu'tëli'.

²⁵ Guéquibe'e ca naca le rizá' ladxi' nu na', lë na'

bigachi', ate' uzóa zxibi nu na', en tseaj ladxi' Dios, ate' inná: "Le nácatë Dios zóalenë' libí'ili'."

Ca ral-la' gunru' ga rudúbiru' queë' Cristo

²⁶ Que lë ni na', böchi' luzá'ado', cate' rudúbili' queë' Cristo, rul-lë' tuë' bönni' dzáguië' libí'ili' tu salmo, ate' rusédinë' ia'tué' tu xibá, ate' ia'tué' riguíxjöi'inë' libí'ili' tu le buluí'inë' Dios lë', ate' ia'tué' ru'ë didza' yúbölö le cabí nazëdë', ate' ia'tué' rudödë' didza' yúbölö na' le cabí nazëdë'. Yúgu'të le gunli' ral-la' gaca le ulu'zí' xibé nupa tu'dubi queë' Cristo.

²⁷ Cate' nacuá' ni' nupa tuí'i didza' yúbölö le cabí nazëdagaca, biti' ral-la' güí'ili' didza' caní ziánrö ca chopa tsónnasili'. Huáca gu'ë didza' tuzë bönni' na', ate' tödi na' huáca gu'ë didza' ia'tué', pero run bayudxi soa nu udödi didza' yúbölö na' le biti' nazëdali'.

²⁸ Channö cuntu nu zoa nu gaca udödi didza' yúbölö na' le cabí nazëdali', nu na' ruí'i didza' yúbölö le cabí nazëda ral-la' soa dxisö ga na' nudúbili', ate' huáca güí'ilen Dios didza' na' lu icja ládxi'da'ahui.

²⁹ Lësca' caní, yugu' bönni' tu'ë didza' uláz queë' Dios ral-la' ilu'ë didza' chopa tsónnasë', ate' ia'zica'rë bönni' na' tu'ë didza' uláz queë' Dios ral-la' ulu'chi'a ulu'söröë' didza' ru'ë bönni' na'.

³⁰ Channö Dios uluí'inë' tu bönni' rö'ë ní' le ré'ëni inná xtídzë'ë, ral-la' soa dxisö nu na' ruí'i didza'.

³¹ Yúgu'tëli' huáca güí'ili' didza' uláz queë' Dios tu tuli' para izëdali' yúgu'tëli', en idipa ládxi'li' ca' yúgu'tëli'.

³² Yugu' bönni' tu'ë didza' uláz queë' Dios huáca ila'nná be'e cuíngaquie', en ila'cu'ë dxisö.

³³ Calëga Dios nu run ga rutsátsaru', tu' rë'ënë' Lë' gácaru' ba'a ladxi', ca na' runë' ga nacuá' yúgu'të cö' bönachi queë' Cristo.

³⁴ Ral-la' ila'cuá'anu dxisö nigula queëli' ga na' rudúbili'. Biti' dë lu ná'agacanu ilu'ínu didza' ni'. Ral-la' ila'cuá'anu nöxaj ca na' rinná bë' xibá queë' Dios.

³⁵ Channö tē'ëninu ila'yéajni'ínu ia'lati', ral-la' ila'nábinu bönni' que queégacanu cate' ni' nacu'ë lédxigaquië'. Biti' ral-la' ilu'ínu didza' yugu' nigula ga na' rudúbiru' queë' Dios.

³⁶ ¿Naru' réquitseli' bunödzejë' Dios xtídzë'ë lu ruá'ali' libí'isili'? ¿Naru' réquitseli' bidxín xtídzë'ë Dios queézili' libí'ili'?

³⁷ Channö nu bönni' nútsë'ë ladjali' réquinë' ru'ë didza' uláz queë' Dios, o réquinë' zóalenë' Dios Bö' Lá'ayi lë', bönni' ni ral-la' si' lu në'ë naca xibá queë' Xanru' le ruzúaja' queëli' lu guichi ni.

³⁸ Na'a, channö cabí ru'i ládxe'ë didza' ni, bití' güi' ládxi'li'-në' bönni' na'.

³⁹ Que lë ni na', böchi' luzá'ado', guli'güi' ládxi'li' güi'ili' didza' uláz queë' Dios, en bití' inná bé'eli' nu ru'i didza' yúbölö le cabí nazëda.

⁴⁰ Ral-la' gunru' yúgu'të ca sa'yéaj, en lu yöl-la' ba'a ladxi'.

15

Bubanë' Cristo lu yöl-la' guti

¹ Na'a, böchi' luzá'ado', riguixjöi'ida' libí'ili' ca naca didza' dxi'a na' bena' libán que ga zóali', lë na' guzxí' lu ná'ali', ate' run ga nácarö idú ca réajlë'ëli' Cristo.

² Ni'a que didza' ni uláli', channö gunli' ca rna didza' dxi'a na' bena' libán que ga zóali', channö le nácaté guyéajlë'ëli'-në' Cristo.

³ Ga gusí lo budöda' lu ná'ali' le budödë' Dios lu na'a neda'. Caní rna: "Gútië' Cristo uláz queëru' tu' nabága'ru' dul-la'." Ca naca lë ni nazúaj lu guichi lá'ayi le rna ben bayudxi benë'.

⁴ Rna ca': "Bigachë'ë yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rna ben bayudxi guca queë'.

⁵ Gudödi ni' buluí'i lahuë' Cristo, ate' bilé'enë' Pedro Lë', en gudödi ni' idxínnutë' gubáz queë' bila'lé'enë' Lë'.

⁶ Ní'irö buluí'i lahuë' lógaquië' zíanrö ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxön. La'tu'biqui' yúgu'të böchi'ru' ni nacu'ë nabángaquië' na'a, sal-la' bal-lë chinátigaquië'.

⁷ Ní'irö Jacobo bilé'enë' Lë', en gudödi ni' buluí'i lahuë' lógaquië' yúgu'të bönni' gubáz queë'.

⁸ Ga yöjsetë buluí'i lahuë' ca' lahua' neda'. Ca guca lë ni, naca' ca tu bí'ido' gúljabi' cate' chigudödi dza ral-la' gáljabi'.

⁹ Caní naca, tu' nácara' neda' cá'asö ca yúgu'të bönni' gubáz queë', en bití' naca' neda' lesaca' sí' la' gubáz queë', tu' gudxía ládxa'a bönachi queë' Dios.

¹⁰ Na'a, tu' buzá' ládxe'ë quia' Dios naca' le naca' na'a, en calëga nítisö buzá' ládxe'ë quia'. Béntëra' neda' xichiné' ca ia'zíca'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin.

¹¹ Na'a, channö bena' libán neda' o channö gulunë' libán ia'zíca'rë' bönni', lë ni le runtu' libán

que, en le guyéajlë'ëli' libí'ili'.

Ubanru' lu yöl-la' guti

¹² Runtu' libán queë' Cristo ca na' bubanë' lu yöl-la' guti. Channö caní naca, ζnacxi caz naca, rnnali' bál-lali': "Biti' ulu'bán nupa chinátigaca"?

¹³ La'tu' cabí ulu'bán nupa chinátigaca, bití' bubanë' Cristo,

¹⁴ en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queëli' Lë'.

¹⁵ Ia'stú, la'tu' cabí bubanë' Cristo, rizí' yë'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios bití' busubanë' Cristo.

¹⁶ La'tu' cabí ulu'bán nupa chinátigaca, bití' bubanë' Cristo,

¹⁷ en la'tu' cabí bubanë' Cristo, nítisö naca yöl-la' réajlë' queëli' Lë', ate' nagá'anagaca dul-la' nabága'li'.

¹⁸ Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'.

¹⁹ Channö tsánnisö ni zóaru' nabanru' huáca uzí'iru' xibë' Cristo, nácaröru' bayechi' ca yúgu'të bönachi.

²⁰ Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti.

²¹ Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'tué' bönni' guyú'u yöl-la' rubán quégaca nupa chinátigaca.

²² Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo.

²³ Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiquequi queë' Cristo cate' huödë'.

²⁴ Ní'irö idxín dza údxi cate' ugüë' Cristo idútë le dë lu në'e, en idútë yöl-la' unná bë', en idútë yöl-la' huáca que tu' xihui', ate' udödë' yöl-la' unná bë' queë' lu në'ë Dios Xuz.

²⁵ Run bayudxi inná bë'ë Cristo ga idxinrö dza chibenë' Dios ga ulu'zechu zxíbigaca lahuë' Lë' yúgu'të nupa ta'dá'baga' Lë'.

²⁶ Le ridá'baga' Lë' le usunítië' ga údxi naca yöl-la' guti.

²⁷ Dios chinudödë' yúgu'të lu në'ë Zxí'inë' para inná bé'enë' le. Nazúaj lu guichi lá'ayi, rna: "Budödë' yúgu'të lu në'ë para inná bé'enë' le." Na'a, naca bë' bití' budödi cuinë' lu në'ë Zxí'inë', tu' naca cazë' Lë' Nu rudödi yúgu'të lu në'ë Zxí'inë'.

²⁸ Cate' idxín dza ni' chinudödë' Dios lu në'ë Cristo yúgu'të para inná bé'enë' le, ní'irö Lë' cazë' Zxí'inë' udödi cuinë' lu në'ë Dios, Nu na' budödi lu në'ë Zxí'inë' yúgu'të, ate' ga údxi, Dios inná bé'enë' tsaz yúgu'të.

²⁹ Bál-lali' ridí'ali' nisa uláz quégaca nupa chinátigaca. Channö réquili' bití' ulu'bán nupa na' chinátigaca, ¿bizx que ridí'ali' nisa uláz quégaca nupa chinátigaca?

³⁰ Zoa bönadxi queëtu' gátitu' yúgu'të dza. ¿Bizx que ru'itu' lataj gaca caní channö cabí ubanru' lu yöl-la' guti?

³¹ Yúgu'të dza zoa bönadxi gátia'. Riguíxjöi'ida' libí'ili' lë ni, böchi' luzá'ado', tu' raza ládxa'a le bena'. Caní naca tu' bena' ga réajlë'ëli' Xanru' Jesucristo.

³² Channö tu' gú'unisida' gudíl-lalena' böa' guixi' sínia' lu yödzö Éfeso, ¿bizxi caz uzi'a xibé? Channö cabí ulu'bán nupa chinátigaca, ral-la' gunru' ca ta'nná bönachi: "Gui'aj gáguru' tu' huátiru' cuxö huidzaj."

³³ Biti' güf'ili' lataj nu si' ye'e libí'ili'. Channö si' lu ná'ali' láti'do'os le cabí nácatë, idútëli' huóacali' chul-la niti.

³⁴ Buli'bí'i ládxi'li', en bití' gunli' dul-la' tu' cabí núnbé'ëli'-në' Dios bál-lali' libí'ili'. Rnnía' caní para guna' ga utuí'ili'.

Ca ilaca nupa ulu'bán lu yöl-la' guti

³⁵ Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácagaca cazë' cate' ulu'dxinë'?"

³⁶ Li', bönni' bití' bi nözinë'. Lë na' rázu' luyú bití' ilén channö cabí initi.

³⁷ Lë na' rázu' luyú naca tu xisédo'os, nadxi ca' que zxoá' xtila o que ia'tú guixi' cuando'. Lë na' rázu' bití' naca guixi' cuando' na' ral-la' ilén.

³⁸ Dios runë' ga gaca guixi' cuando' ca nun cazë' que. Ca naca tu tu xisédo' na' runë' ga gaca guixi' cuando' que.

³⁹ Lësca' caní, bití' naca lëbisö bëla' que queégacaba' yúgu'tëba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguínni, en ia'tú ca naca bëla' quégacaba' böla.

40 Lësca' caní nadzá' idú ca nácagaca caz nupa nacuá' yehua' yubá ca naca idú ca nácagaca caz nupa nacuá' luyú ni. Zoa tu yöl-la' lachi quégaca nupa nacuá' yehua' yubá, en ia'tú ca naca yöl-la' lachi quégaca nupa nacuá' luyú ni.

41 Zoa tu yöl-la' lachi que gubidza, en ia'tú que beo', en ia'tú quéguequi bōlaj lúzxiba. Yöl-la' lachi que tu bōlaj lúzxiba nadzá' ca naca yöl-la' lachi que ia'tú bōlaj lúzxiba.

42 Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bēla' initi. Cate' ubán, ní'irō gaca tu le soa tsaz.

43 Cate' rigachi' lu yeru ba naca tu bēla' cá'asō, en le nacuidi'. Cate' ubán, ní'irō gaca tu le lachi, en le nál-la.

44 Cate' rigachi' lu yeru ba naca tu bēla' que yōdzōlió ni. Cate' ubán, ní'irō gaca tu le soa tsaz yehua' yubá. Zoa tu bēla' que yōdzōlió ni, en ia'tú ca gaca le idzaga bō' naca cázaru'.

45 Nazúaj lu guichi lá'ayi le rnna: "Bōnni' na' gusí lahuē' zoē' luyú ni, lē' Adán, Dios benē' lē' bōnni' ban", pero Bōnni' na' guyáziē' xilatjē' Adán, Lē' Cristo, Dios benē' ga náquiē' Bō' nabániru'.

46 Biti' blē'ē zí'alō Bōnni' na' náquiē' Bō'. Bla' zí'alō nu na' naca bōnáchisō, ate' ní'irō blē'ē Bōnni' na' náquiē' Bō'.

47 Bōnni' ni' blē'ē zí'alō, gúquinē' yu. Bōnni' na' blē'ē burópilō, Nu na' naca Xanru', birúajē' yehua' yubá.

48 Nupa nacuá' luyú ni nácagaca ca gúquiē' bōnni' na' gúquinē' yu, ate' nupa ral-la' tsōjcuá' yehua' yubá ilaca ca naca Nu na' birúaj yehua' yubá.

49 Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huóëquiru' ca néquinë' Nu na' birúaj yehua' yubá.

50 Caní rë'ëni inná lë ni rea' libí'ili', böchi' luzá'ado', rnníá': Le néquini bëla', en rön biti' gaca tsaz ga ni' rinná bë'ë Dios, en lësca' caní, lë na' initi biti' gaca ideli' lë na' soa tsaz.

51 Buli'yútsöca', rea' libí'ili' tu le bigachi': Biti' gátiru' yúgu'tëru', pero Dios utsë'ë ca nácaru' yúgu'tëru'.

52 Tsárido'os gaca, tsca naca tu le rutásö guió'j loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsë'ë le néquiniru' yúgu'tëru'.

53 Lë na' nácaru' le riniti ral-la' huóáca le soa tsaz, ate' le néquiniru', lë na' ral-la' gati, huóáca tu le catu caz gati.

54 Cate' lë na' riniti chinuhuóáca le soa tsaz, enca' lë na' ral-la' gati chinuhuóáca le catu caz gati, ní'rö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

55 Bítí'rö inná be'e yöl-la' guti rë'u.

Bítí'rö gaca yöl-la' guti bi gun queëru'.

56 Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios.

57 ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

58 Que lë ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz quézili' biti' runli' nítisö xichinë' Xanru'.

16

Yugu' bönachi Corinto tu'nödzej quégaquië' böchi'gaca ta'yádzjanë'

¹ Na'a, ca naca que dumí na' unödzejali', le gácalen böchi'ru' ta'yéajlë'ë Cristo nacu'ë Jerusalén, guli'gún na'a ca na' gunná bé'eda' yugu' cö' bönachi queë' Cristo, nacua' luyú Galacia.

² Yugu' dza domingo, tu tuli' ral-la' cú'uli' quez lati' dumí, tsca na' Dios runnë' queéli'. Guli'gún chi'i le, para cabí gun bayudxi bi utúbili' cate' idxina' ga zóali'.

³ Cate' ni' idxina' ga zóali', isöl-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bé'gaquië', ate' ilu'ë dumí na' unödzejali'.

⁴ Channö ral-la' tseja' ca' neda', tsójacalenë' neda'.

Le ré'ënë' gunë' Pablo

⁵ Guída' ga zóali' cate' údxi töda' yugu' yödzö luyú Macedonia, tu' run bayudxi töda' yugu' yödzö na'.

⁶ Réquida' ugá'analena' libí'ili' tu chi'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gáti'tës ga ral-la' tseja'.

⁷ Cate' guída' uduyúa' libí'ili' biti' ré'ënda' tódisa' ni'. Runa' löza sóalena' libí'ili' xidzé, channö gunnë' Xanru' neda' lataj.

⁸ Ugá'ana' ni lu yödzö Éfeso ga idxinrö dza Pentecostés

⁹ tu' dë lataj ni guna' tu dxin zxön queë' Xanru', sal-la' zían nupa ta'dá'baga' neda'.

¹⁰ Channö idxinbi' bi'i Timoteo ga na' zóali', guli'gü'i ládxi'li'-bi', para cabí ubi ugu'íbi' tsanni

ni' sóalenbi' libí'ili', tu' runbi' xichiné' Xanru' ca na' runa' neda' xichiné'.

11 Que lë ni na', cuntú nu ral-la' uzóa lëbi' tsólá'alö. Guli'gácalen-bi', ugú'uli'-bi' nöza idú tsáhuí'do', para udxinbi' ga ni zoa' neda', tu' riböza'-bi' lëbi', enca' yugu' böchi'ru' túnlenë'-bi' tsözxön dxin.

12 Ca naca queë' böchi'ru' Apolos, gúta'yua' lahuë' tsejë' tsöjyüë' libí'ili' tsözxön len yugu' böchi'ru', pero bití' ré'ënë' tsejë' na'a. Guídë' cate' séqui'në'.

Didza' ru'ë Pablo ga ruúdx

13 Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ladxí', en bulí'tipa ládxi'li'.

14 Len yöl-la' nadxí'i guli'gún bíti'tës bi gunlí'.

15 Na'a, böchi' luzá'ado', chinöz quézili' ca naca queë' Estéfanos, enca' quégaca dí'a dza queë'. Nácagaca nupa gula'sí lógaca ta'yéajlë' Cristo ladaj bönachi nacúa' luyú Acaya. Bulu'dödi cuíngaquië' para ilunë' xichíngaca bönachi queë' Dios.

16 Ráta'yua' lolí', böchi' luzá'ado', gunlí' bal nupa nácagaca ca böchi'ru' na', enca' ca nácagaca nupa tunlen légaquië' tsözxön dxin, en tácalen légaquië'.

17 Rudzėjada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queéli'.

18 Bulu'huë tsáhuë'ë neda' ca na' bulu'huë tsáhuë'ë ca libí'ili'. Guli'gún bal bönachi caní.

19 Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigaquië' tu'gapë' Dios libí'ili'.

²⁰ Yúgu'të böchi'ru' ni tu'gapë' Dios libí'ili'.
Guli'gapa Dios tuli' ia'tuli', en unída'li' luzá'ali'.

²¹ Neda', Pablo, len na' cuin caza' ruzúaja' lu
guichi læ ni, rnnía': Rugapa' Dios libí'ili'.

²² Nu biti' nadxí'i Xanru' Jesucristo, chinabía dö'
nu na'.

Gudá Xanru'.

²³ Rinábida'-në' Xanru' Jesucristo uzá' ládxë'ë
queéli'.

²⁴ Nadxí'ida' yúgu'tëli' tu' nácaru' tuz len Xanru'
Jesucristo. ¡Ca' gaca!

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25